



候

命下之日本部移咨提督兩廣都御史歐陽

同總兵官陳 查照御史黃

所奏事情協

謀計處審勢相機如果流毒鄉邑法不可原橫
行猖獗勢不容緩一面星馳具

奏一面從宜動調廣州肇慶等處達官達舍及附
近衛所官軍左右兩江土兵大約不過九千員
名分作三枝選委謀勇文武官員統領前去將
前項稔惡黎賊村崗查審明確分別畫圖相機
進剿諸不係為惡村崗先期分委的當人員曉

諭安業勿使自相驚疑近兵之日仍戒勿得折
馘良善濫及無辜以希功賞違者聽巡按御史
指實叅劾其或首惡已就誅擒餘黨願從招撫
即行從宜處分或即要害處所團結軍兵置戍
或令村崗黎長歲時到官省諭不必興師動衆
以滋邊患可剿則剿可撫則撫務期蠻氛早蕩
邊域底寧以稱委任仍移咨都察院轉行彼處
巡按御史隨軍紀驗等因覆題奉

聖旨是欽此欽遵又准兵部咨為走報地方緊急黎
情事該臣等會題前事奉

聖旨兵部知道欽此欽遵本部查與御史黃
奏相同咨臣查照本部先次咨文備奉

欽依內事理會同總兵官陳一體查照施行各備

咨前來臣等俱經通行欽遵會議續據廣東布
政司呈該本司掌印右布政使蔡雲程會同按
察司掌印按察使李遂都司掌印署都指揮僉
事劉滋分守海南道右叅議方民悅巡視海道
副使黃光昇帶管糧儲左叅政沈應龍覆議得
前項叛黎憑恃險阻大肆猖獗崖民節被殘掠
而村落為空感恩繼遭圍困而焚燒殆盡殺戮

男婦慘不可言拒敵官軍罔無所忌群聚犬羊而遠邇望風響應包藏變詐而負固比昔益堅罪惡貫盈神人共憤

天討在所必加大征斯不容已合用調集漢達土官軍兵多寡開報各崗村巢首從賊徒名數分別善惡鄉村布列進止哨道等項機宜已該兵備副使朱憲章叅將武鸞都指揮梁希孔親臨審覈俱亦詳悉但該道條議事件比照嘉靖二十年大征舊規間有未備職等亦經叅酌損益開立前件議擬明白合候呈詳允日備行各該衙

門查照一一作速舉行務要先事整備毋致臨期缺乏應用監統監督紀功并管理糧賞文武官員與廣西土官目兵人等並聽軍門選委督調尅期前去用事其中尚有未盡情節職等難以遙獲并聽各官隨機濟變應呈請者徑自呈請施行等因又據瓊州府崖州鄉官原任知縣教官監生生員趙文獻溫仁揚仕輔黎仕奇等連名呈為緊急賊情懇乞大兵征剿事內開止強一村倡禍諸黎怙亂已經一年攻破村鄉殺擄人財不可勝數今則各樹名號有總兵叅將

指揮千百戶等官名目坐轎乘馬張傘執旗戰
有絕律鋒莫敢犯懇乞憐憫海隅蒼生早發大
兵征剿等因各前來又該臣等會議得崖州感
恩昌化等縣地方止強我淺等村黎賊那燕等
本以漏殄遺孽因忿倡亂遂乃扇動徒黨傳箭
效尤臣等念其釁端起於有司倡有成於一人
節行該道守巡兵備等官引咎開誠多方撫戢
及行拏判官黃本靜正罪以伸其憤乃猶敢益
肆猖狂略無省悟攻圍城廓劫掠鄉村擄財必
繼以蕩焚殺人動至於支解或愈撫而負固益

堅或暫從而尋復背叛或陽順而陰逆或沒東
而出西馳突充斥之勢益甚於往年狡猾變詐
之機莫測其常性今又敢偽擬總兵叅將指揮
千百戶等官名號坐轎乘馬張傘執旗三州縣
之地遭其破殘一海南之境被其搖動罪惡貫
盈神人共憤此

王法之所必誅而弗可赦者也既經該道守巡叅將
等官重複計議應剿村崗應分哨道畫圖貼說
前來又該三司各官覆行會議相同委應亟舉
又經會本題

知及行廣東布政司整辦軍需糧餉等件并差官
齎執

令旗令牌分投前去起調左右兩江土官目兵并
附近衛所漢達官軍民壯打手人等又行委鎮
守廣西地方副總兵沈希儀督調各土官目兵
廣西布政司分守左江道右叅議康朗廣西按
察司帶管整飭兵備兼管分巡左江道副使徐
禎分守潯梧地方左叅將王寵分守柳慶地方
右叅將劉遠各督押前到雷州及行委廣東按
察司巡視海道副使黃光昇顧覓海船渡兵今

俱齊集應會分哨進剿及查原委統兵廣東都
司署都指揮僉事梁希孔已該臣叅劾不職守
備惠潮地方惠州衛文倖都指揮僉事張宗陞
任福建行都司軍政僉書俱應改委更替又准
兵部咨為剷除黎患以靖地方以圖經久事該
吏科右給事中鄭廷鵠題前事本部看得本官
題稱瓊州府屬崖州感恩昌化地方黎賊構亂
負固不悛進兵之數止於九千不無尚寡當添
調狼土官兵打手數萬期以不誤軍機聲勢大
振所至披靡及稱成功在勇圖揆在謀克捷雖

難經畧為上其所當圖揆并經畧者各三事乞
要再加詳議施行一節為照本官前項疏陳大
意以黎寇之猖獗異常兵必大集征必慎謀藉
謀以揚威則巨患可息乘威而布法則善後可
圖是其聞見真切計慮周詳相應議擬合候

命下本部移咨提督兩廣都御史歐陽

會行總

兵官督同該地方官員計量賊勢如果重大即
便添調狼兵募集打手人等及時並進大加剿
除其始也據陵水以搗其穴而遏其趨安黎岐
以散其黨而孤其勢土舍藏姦多方防杜首功

多寡不必大拘如前所云當圖揆者其終也招
集新民定以約束多興學校禁挾弓矢復故地
設縣所授田廬鑿通衢防阻塞建參將於要地
使之畫便宜治城廓興水利徙反側如前所云
當經畧者若果有關於用兵及善後之道務要
一一舉行中間儻有未盡或難於執泥者亦聽
隨時斟酌期於計出萬全功收一舉以為瓊人
求利勿蹈往年故轍徂於近功因循苟簡塞責
了事其所稱建立參將久任責成一事猶係要
務查得嘉靖十九年瓊崖等處已經設有此官

後該彼處提督建言裁革不虞其有今日似失之輕合無備行撫鎮衙門作速查議如果相應復設即便相擇適中堪以駐劄地方畫圖貼說并查舉謀勇素著堪任叅將官數員一併題請定奪再照前項黎賊僭立名號攻逼所城流劫鄉村殺害人民不計其數州縣地方五六百里之間道路為之不通是其禍甚慘而其勢甚危地方兵備而下軍衛有司責俱難辭但時屬軍興過亦可使合無仍行兩廣提督軍門徑自嚴督各官戴罪幹理彼中兵糧等項待後事畢分

別功罪明白具

奏以憑議擬賞罰等因具題奉

聖旨這剿捕黎賊并處置地方事宜都依擬行兵備等官姑着戴罪管事欽此欽遵備咨前來欽遵通行外臣會同鎮守兩廣地方總兵官征蠻將軍太保兼太子太保平江伯陳 議照崖州感恩昌化等州縣地方廣濶山崗險深黎賊兇悍狡猾倍於往昔勢瀕大舉方克有濟已經陸續調集漢土官兵八萬七千有零謹按地圖分為中左右三大哨中大哨行委廣東都司署都指

揮僉事張國威廣東按察司僉事徐緝督統漢
達官軍打手并思恩田州泗城上林等五府州
縣司土官目兵內分二小哨俱從感恩縣取路
進剿抱里千家多澗德霞羅活止宥方細等村
巢賊左大哨行委原任分守雷廉高肇地方左
叅將今聽調武鸞廣東按察司副使錢嶸督統
漢達官軍打手并向武南丹那地歸順忠州都
康六州土官目兵內分二小哨俱從感恩縣取
路進剿止強石訟抱道南夏陀老落段否淺等
村巢賊右大哨行委廣東都司添註署都指揮

僉事俞大猷廣東按察司副使朱道瀾督統漢
達官軍打手并思明鎮安東蘭湖潤安隆江州
奉議果化八府州司目兵內分二小哨俱從昌
化縣取路進剿我乍那其必改茅安我淺改彩
等村巢賊仍委鎮守廣西地方副總兵沈希儀
提調總領駐劄中哨督率兼調度左右二哨官
兵俱尅定嘉靖二十八年十二月二十八日卯
時一齊抵巢撲剿中間若有被擄人口陷在賊
中不能自拔及賊衆懼誅悔罪投戈願降者大
兵至日許令赤身投赴審實遞送出山從宜安

揆臣等總統各哨親詣雷州府駐劄居中調度
照例約會巡按廣東監察御史陳 同到軍前
糾察姦弊紀驗功次仍坐委廣東布政司右叅
議方民悅總理糧賞廣東按察司副使黃光昇
閱視紀功廣西馴象衛原任福建行都司署都
指揮僉事錢希賢中軍坐營管事申令誓衆務
將前項山崗首惡黎賊嚴加剿滅脅從餘黨招
徠撫安期於海島克靖地方底寧除候獲功及
事寧查覈功罪人員并善後事宜俱另行具
奏外緣係尅期進兵剿賊及懇乞大兵剿除劇惡

黎賊早救民命以全地方事理爲此具本

嘉靖三十八年十二月十六日

欽差提督兩廣軍務兼理巡撫兵部右侍郎兼都察

院右副都御史臣歐陽

爲剿平黎賊查覈

功罪以明賞罰事據廣東按察司整飭嶺東道
兵備兼分巡監督中哨僉事徐緝廣東都司軍
政僉書統督中哨署都指揮僉事張國威呈奉
臣等會劄爲懇乞大兵剿除劇惡黎賊早救民
命以全地方事依奉會同將調到漢達官軍目
兵分爲四小哨一哨指揮楊燁部領官軍打手

并田州上林歸德向武等自兵由解朗路進剿
抱里抱麻抱榜千家抱井等村巢一哨指揮胡
有名部領官軍打手并泗城上林目兵由黃鰲
路進剿抱宥多澗抱止肥抱解等村巢一哨指
揮王溥部領官軍打手并思恩目兵由北黎港
路進剿德霞抱牒抱籠止宥等村巢一哨指揮
馬鎮部領官軍打手并田州目兵由響水河路
進剿羅活崗七坊抱道辦銳允陽甕桐等村巢
指揮安憲李儲芳部領官軍打手專在中軍策
應并量撥旗軍打手黎兵鄉兵責委指揮趙廷

舉把截落基營指揮任漢把截牙力營指揮陳
忠言把截高村河營職等督押各哨軍兵齊至
牙力營宣布威令照依尅定嘉靖二十八年十
二月二十八日卯時一齊抵巢各賊於險隘逕
路豎立排柵開掘濠塹懸木壘石預為準備仍
用強弓利矢皮盔角甲聚集各山險嶺結陣以
待指揮楊燁馬鎮二哨官兵會攻千家等村巢
營陣方布各賊擁衆突出挑戰賊高我下兵未
得利乃引兵少退佯為敗勢各賊奔擁下山我
軍奮勇直衝其中田州土官男岑芝親斬大賊

首那奪一顆上林縣土官男黃文瓚親斬賊首
那傑一顆各兵乘勝殺入斬獲賊從四十一顆
被賊射死黃文瓚馬一匹被傷軍兵一十四名
指揮馬鎮哨官兵督同岑芝目兵徑抵羅活大
巢各賊吹角為號箭下如雨我兵分為奇正賊
果衝突中軍射死目兵二名奇兵左右齊發鼓
譟而前岑芝當陣斬獲賊一顆各兵奮勇爭先
斬獲賊從五十九顆追趕至抱雨山連斬賊從
九十四顆被傷軍兵三十六名陣亡目兵一十
四名指揮胡有名王溥會兵夾攻德霞抱宥等

巢胡有名部下斬獲賊從二十七顆被傷軍兵
一十一名王溥部下斬獲賊從三十五顆被傷
軍兵一十名餘賊奔散走投抱井抱解抱慄抱
榜甕桐等處高山絕嶺緣崖附木各立巢寨夜
則吹角相呼聚集職等慮恐各賊合勢難以卒
勝隨將四哨官兵每哨又分為三小哨於賊行
要徑結為連珠營以絕其往來道路旌旗火鼓
晝夜不絕以疑賊心乃令各哨官兵四路攻打
連破抱井抱蓋甕桐抱榜等巢揚燁哨生擒賊
首一名蔡四仔賊從五名斬獲賊首那閑等三

顆賊從一百八十一顆被傷軍兵二十二名馬
鎮哨生擒賊從七名斬獲大賊首那恨一顆賊
首那瓜等五顆賊從一百八十四顆被傷目兵
一十九名陣亡目兵六名胡有名哨生擒賊從
八名斬獲大賊首那貶一顆賊首那享等四顆
賊從二百三十顆被傷軍兵二十九名陣亡目
兵一名王溥哨生擒賊從一名斬獲大賊首那
叫一顆賊首那吞等二顆賊從一百顆被傷軍
兵一十二名指揮安憲李儲芳哨生擒賊首一
名陳福賊從十三名斬獲賊從十二顆其允陽

一帶係生岐巢穴去羅活一百餘里崖壁峻絕
藤棘叢結抱宥德震羅活等巢狡猾惡賊尚有
逃藏於內傳箭深岐構聚欲出闕敵職等先令
黃文瓚帶同頭目潛往哨探一面督發各哨官
兵抵巢看得前巢峻壁插天巖壑百丈礪木滾
石正路難進選差善懸崖者十人各持一炮於
寨左緣藤而上埋伏於後山又令數十人各持
苦茅一束埋伏於左山深樹中尅定日時進攻
火炮齊發各賊不虞我兵能入自相驚擾官兵
奮勇攀崖爭先各賊男婦牛畜奔命投崖墮壑

者不可勝計馬鎮哨斬獲賊首那懇等五顆賊
從二百一十八顆被傷目兵打手共一十一名
陣亡達舍打手共二名王溥哨斬獲賊首那隱
等三顆賊從一百九十九顆被傷目兵七名胡
有名哨斬獲賊首那墩等二顆賊從一百五十
三顆被傷目兵三名楊燁哨斬獲賊首那橋等
二顆賊從五十五顆被傷目兵五名大賊首那
卓帶賊二百餘徒奔命官兵冒險窮追至抱吊
山馬鎮哨生擒賊從六名斬獲賊首那堆等二
顆賊從四十四顆被傷目兵四名楊燁哨生擒

賊從七名斬獲賊從六十顆被傷目兵五名黃
文瓚望見一賊皮盔角甲甚整料是那卓拚命
追捕至允屯山斬獲那卓彼黃文瓚被暗箭射
中胸膛回營身死胡有名哨生擒賊從九名斬
獲賊從三十一顆王溥哨生擒賊從九名斬獲
賊從三十四顆楊燁哨斬獲賊從六顆馬鎮哨
斬獲賊從五顆官兵四路搜扒去五指山七八
里只見禾苗茂盛並無賊踪掣兵而返本哨通
共擒斬首從賊人賊級一千八百七十名顆俘
獲賊屬男女三百八十八名口奪回被擄男女

一十七名口奪獲器械八百零九件牛六十五頭馬一匹及差人齎執旗榜撫諭投順除老幼并婦女不計及以後招出另報外共見招過男子三百九十八名俱審實心向化陸續發崖州安插其羅活峒道路自西北至抱宥抱墩抱解抱榜黃鰲直至黃流自西南至多澗千家解朗直至九所各一帶二百餘里督令掘鑿木石填塞溪塹每路濶三丈餘俱為車馬往來通衢除將前項功次俱行解報賊屬牛馬委官變賣銀兩入官器械給發各哨軍兵打手領用被擄人

口審實給親及將土官目兵人等於嘉靖二十九年四月初三日掣回休息量留旗軍打手人等委指揮等官李儲芳等督領在彼防守外為照瓊崖黎岐延袤千里外有重山疊嶺以扼其隘口內有峭壁荆蘿以盤其巢穴種類繁息弓矢矯捷而千家多澗抱宥德霞羅活直至允陽一帶約三百餘里尤為黎岐淵藪但自昔用兵未有搗其巢穴以致各賊憑險僭竊荼毒萬姓并邑丘墟人民耗散怨恨之氣播於上穹茲者官軍奮勇萬衆協心搗穴犁巢剿撫殆盡一方

蕩平千里。衽席等因。又據廣東按察司清軍監
督左哨副使錢嶸原任分守雷廉高肇地方。今
聽調統督左哨左叅將署都指揮僉事武鸞呈
稱。依奉將調到漢達官軍土官目兵分爲二小
哨。一抱浩哨。委都指揮殷紹禹部領旗軍達官
打手并向武那地歸順州土兵。由高村河路進
一抱蘊哨。委以都指揮體統行事。指揮黑孟陽
部領旗軍達官打手并南丹都康忠州土兵。由
抱損村路進。合剿抱浩抱道南夏陀老晨門抱
世落段否淺抱班多港止強石訟抱顯等三十

餘村巢。及委指揮顧賢部領旗軍達官打手并
思恩報効目兵。專在中軍策應。并量撲旗軍鄉
兵黎兵民壯打手。責委知州指揮等官。鄺民舉
等把截。郎温高村大茅榆林長沙姚妹等營職
等督押目兵。齊至崖州。申令宣誓。遵照尅期。嘉
靖二十八年十二月二十八日卯時。一齊抵巢。
指揮黑孟陽當日進攻。否淺落段抱班三巢各
賊糾集千餘下山拒敵。官兵奮勇衝擊。各州目
兵斬獲次賊首那恨那懇并賊從共一百三十
八顆。陣亡土兵二名。被傷目兵十九名。都指揮

殷紹禹督兵到合面嶺賊徒聚衆預在埋伏本嶺峭聳樹木蒙翳石路歌滑官兵攀援次第挨登各賊憑險拒敵礮石滾木亂擲如雨目兵被傷奮敵自卯至申殷紹禹設法分枝別進攻開排闥各兵斬獲賊徒一十九顆各賊勢敗奔入大山官兵黏踪二十九日直至止強巢賊徒又先據嶺向武州土官知州黃仲金歸順州官族岑球一枝官兵由深水抱道逕進各賊分踪拒敵黃仲金親督目兵衝開寨門斬獲賊徒一顆追至抱世嶺各賊奔竄止斬獲賊徒二顆抱道

晨門抱世養鮮四村賊先搬併大巢止遺空村當統官兵直搗石訟巢各賊原豎排柵數層埋插箠簦望見兵至呼衆迎敵目兵吶喊奮擊巢破當陣斬獲賊徒三十八顆大賊首那捧被傷一箭脫走陣亡目兵五名被傷目兵二十一名指揮顧賢哨官兵亦至交戰斬獲賊徒七顆被傷打手五名餘賊奔散合面抱班等嶺藏伏連日分兵追剿殷紹禹哨斬獲大賊首李那悼次賊首李丙黨并賊徒共一百零一顆陣亡目兵四名被傷目兵十六名黑孟陽哨斬獲賊徒一

百七十顆被傷目兵十五名顧賢哨斬獲賊從
三十九顆被傷旗軍二名崖州抱臘多港二村
聽撫黎人斬獲賊從二顆把截大茅營巡檢鍾
子曉下斬獲賊從二顆落基營百戶劉謨下斬
獲賊從一顆殷紹禹據報黎賊一宗約一百餘
徒屯劄抱谷大山督率官兵前至山脚仰見峯
巒突兀人馬不通各兵捨馬從間道雜上各賊
叢擁拒敵迎戰數合有向武州目兵冒死衝入
賊陣斬獲賊從二顆諸兵乘勝斬獲賊從一十
四顆各賊且戰且遯目兵粘踪追至仰斗等山

斬獲賊從二十四顆被傷目兵十名黑孟陽據
報有賊結踪屯聚多港後山本官見得岡谿交
阻鼓舞官兵挨牌蔽矢直前迎敵當陣斬獲賊
從一十二顆各賊潰遯落段否淺等山粘追斬
獲賊從三十一顆被傷目兵十三名又據報止
強止哈小營等巢賊徒在于抱籠等山屯劄時
殷紹禹哨官兵已往抱谷山黑孟陽哨官兵已
往多港等山各搜剿不在叅將武鸞率同顧賢
哨漢達官軍打手目兵鄉兵人等齊至抱籠山
包圍分枝前進賊據險設閘矢石齊下路窄巖

高兵難竝進當分兵一半在于閘口佯引戰鬪
一半於深密山菁取路先登各賊因見閘口有
兵盡來拒守輪流出敵陰計後兵將到賊壘前
兵炮響為節腹背夾攻當陣斬獲賊徒二十九
顆各賊奔逃目兵襲至打日等山又斬獲賊徒
四十一顆被傷軍人打手三名又據目兵鄉導
人等稟稱大賊首那燕那捧各帶劇賊潛入岐
山藏躲各岐不容殺逐出外那燕等潛在抱籠
大山那捧同伊男那代并次賊首那夏等潛在
統籠大山藏躲各哨官兵包圍四面那燕那捧

等逃入別穴殷紹禹哨設計生擒大賊首那燕
一名被傷軍兵三名顧賢哨設計生擒大賊首
那捧次賊首那夏那代共三名官兵仍夾剿抱
頂籠大山各賊分枝出敵目兵爭先交戰殷紹
禹哨斬獲賊徒一百四十八顆陣亡目兵六名
被傷軍兵打手三十八名顧賢哨斬獲賊徒五
十五顆盡將賊巢燒毀黑孟陽據南丹州目兵
稟稱搜扒至地名混嶺遇賊結巢山谷險峻兵
寡不敵黑孟陽親督官兵幾戰數合直至日暮
收兵密分四哨乘夜透山取路繞出其背包圍

攻打至夜克破當陣斬獲大賊首那乃并賊徒
共一百五十三顆又據走報殘賊一宗約有千
百餘徒在於南田德按大石嶺等山裝伏屯劄
職等分遣健步尅日合併攻剿各賊逞兇拒敵
各官設謀激衆目兵分投鼓譟而進當日攻破
各巢排柵殷紹禹哨斬獲大賊首那內次賊首
那雀并賊徒共一百四十五顆陣亡目兵九名
被傷目兵三十一名黑孟陽哨斬獲賊徒一百
五十六顆陣亡目兵二十名被傷目兵九十名
顧賢哨斬獲賊徒六十九顆各俘獲賊屬男婦

不等三哨官兵連日搜扒南夏陀老抱班仰斗
止哈一帶山巢殷紹禹哨生擒次賊首那敗歲
斬獲大賊首苻亞壁那現次賊首那禍并各賊
徒共一百零九名顆陣亡目兵三名被傷目兵
十六名黑孟陽哨斬獲賊徒三十四顆陣亡目
兵十九名被傷目兵五十二名顧賢哨斬獲賊
徒七十顆又節據抱懷村聽撫黎人并鄉老鄉
導那會吳尚端等及把截榆林營巡檢唐本連
姚妹營經歷何組千戶谷中寶各陸續擒解逃
賊那虎羅堆等十一名又據各州頭目常敬李

旭并緝事盧偉等報稱領兵前進南夏陀老等
山殺敗殘賊黏蹤追趕多投抱班抱打屯豪官
田各巢并附近後山藏匿各兵奮猛向前冒險
截殺殷紹禹哨斬獲賊從六十二顆被傷目兵
三名黑孟陽哨斬獲賊從二十顆被傷目兵二
名顧賢哨斬獲石訟巢次賊首那克并賊從共
四十一顆又據報稱各賊見聚抱顯村約四五
百徒俱勅賊潛通各山往來接濟職會督三哨
官挑選精兵前去擒剿各賊先自嚴備礮木巨
石堵塞排柵占據高崗矢發如雨官兵迭用火

箭藥弩大斧長錘間道深入自寅至午盡登賊
寨殷紹禹哨生擒次賊首李宗烈審係那燕等
軍師斬獲次賊首李宗能并各賊從共三百八
十一名顆顧賢哨斬獲賊從六十九顆二哨共
被傷目兵十三名旗軍打手十一名又各哨官
兵陸續搜扒斬獲賊從三十四顆本哨通共擒
斬首從賊人賊級二千二百三十四名顆俘獲
賊屬男女奪回被擄男婦奪獲牛馬各除照格
給賞器械亦除簡給各兵外賊屬四百八十六
名口被擄男婦八名口牛馬六十一頭匹器械

一千五百二十八件枝招撫過原出脅從實心
投順共二千一百餘名及原先在城安插七百
餘名各婦女及老幼不計除將功次通行解報
賊屬牛馬炭崖州并分理糧賞委官變賣價銀
貯庫被擄男婦審實給親領回器械貯庫就撫
黎人俱行安插以後續有招到一體施行另報
擇於嘉靖二十九年四月初三日將各土官目
兵掣散量留海南雷州神電衛所漢達官軍打
手人等分布防守遺下黎田聽候委官查勘議
處外職等議照崖州地方僻在儋萬陵感極邊

東西延袤數百餘里中接五指黎母諸山而止
強石訟抱顯否淺諸巢實係先年漏殄兇黨首
謀攻圍城邑敵殺官兵皆罪惡貫盈神人憤怒
者也今渠魁若那燕那捧那夏那代那敗歲李
宗烈等一向偽號叅將守備軍師等名目者悉
已生擒首從賊徒斬獲功級時雨收於大霈之
餘兵農稱快撫招出於迅掃之旣海隅奠安等
因又據廣東都司添註軍政僉書統督右哨署
都指揮僉事俞大猷會同廣東按察司整飭兵
備兼分巡海南道監督右哨副使朱道瀾呈稱

職等先期親到附近賊巢昌化縣暫劄緝探得
賊首符門欽桀惡為最肆山道路盡行開坑設
闌志在拒敵死戰職等將蒞到漢土官兵分發
指揮鄭金等四面把截指揮吳樹領兵一哨由
峩溝進攻峩顯等巢指揮張重仁領兵一哨由
落梅上下二路進攻峩淺等巢指揮胡松領兵
一哨由陀蠻進攻抱透水尾等巢遵照尅定嘉
靖二十八年十二月二十八日卯時四面齊進
與賊大戰指揮張重仁督兵攻破峩淺巢斬獲
賊從七十顆俘獲老婦幼男十一名口奪獲水

牛二頭馬二匹器械一十五件指揮胡松督兵
攻破抱透水尾巢斬獲賊首符門福一顆賊從
一十七顆俘獲大婦十口奪獲器械七件指揮
吳樹督兵攻破峩顯巢斬獲賊從六十三顆奪
獲器械一十一件餘賊退據肆山結寨拒敵嘉
靖二十九年正月初二日張重仁督兵斬獲賊
從三十一顆胡松督兵攻破改討等山寨生擒
賊謀主一名柯宗賢斬獲賊從三十顆張重仁
等各哨會兵夾攻峩落山寨初三等日張重仁
部下生擒賊從一名斬獲賊從三十九顆俘獲

老婦幼男八名口奪獲器械三件吳樹部下斬
獲賊從二十九顆奪獲器械九件牛一頭胡松
部下生擒賊從二名斬獲賊從二十九顆俘獲
老婦幼女七口把截松村營千戶杜盛督兵生
擒賊從一名斬獲有名賊首符那底一顆賊從
九顆把截陀興營指揮趙焯督兵斬獲賊從一
顆把截大官田營指揮鄭金督兵斬獲賊從一
顆張重仁督兵攻破陀定山寨生擒賊從三名
斬獲賊從五十八顆俘獲大婦幼男女一十八
名口奪獲水牛二頭器械七件松村營千戶杜

盛督兵生擒賊從一名斬獲賊從五顆把截必
改營指揮陳希周督兵斬獲賊從一顆吳樹胡
松會兵合攻我望山寨吳樹部下生擒賊從一
名斬獲賊從三十一顆俘獲大婦幼男十名口
奪獲水牛一頭胡松部下斬獲賊從九顆張重
仁部下生擒賊從二名斬獲賊從四十八顆俘
獲大婦幼男十九名口陀興營指揮趙焯督兵
斬獲賊從一十一顆松村營千戶杜盛督兵生
擒賊從一名斬獲賊從五顆俘獲大婦四口胡
松督兵攻雲道山寨斬獲賊從四十一顆俘獲

大婦四口把截松村營百戶陸中玉督兵生擒
賊從一名斬獲賊從一十五顆張重仁等各會
兵合攻破落蠻山寨張重仁部下生擒賊從三
名斬獲賊從二十四顆胡松部下生擒賊從一
名斬獲賊從三十一顆吳樹部下生擒賊從一
名斬獲賊從四十二顆張重仁督兵攻破抱黑
山寨斬獲賊從四十顆胡松督兵攻破茶烏山
寨斬獲賊從三十二顆把截必改營指揮陳希
周督兵生擒賊從一名斬獲賊從九顆張重仁
督兵攻破陀興寨斬獲賊從四顆俘獲大婦幼

男女共四十一名口二十一等日本官復督兵
於陀興并抱陀山對敵斬獲賊從二十五顆又
斬獲賊從三十四顆吳樹胡松各督兵攻抱定
嶺寨吳樹部下生擒賊從一名斬獲賊從三十
八顆胡松部下斬獲賊從一十七顆俘獲大婦
一口張重仁復督兵於陀興山斬獲賊從六顆
松村營百戶陸中玉督兵斬獲賊從七顆張重
仁又督兵對敵斬獲賊從共一十五顆胡松督
兵攻破陀我山寨斬獲賊從一十五顆又攻破
陀茅嶺寨斬獲賊從一十四顆定安縣把截土

舍許承宣斬獲賊從四顆生擒賊從一名二月
初一等日吳樹督兵攻破白嶺寨斬獲賊從五
十二顆俘獲大婦二口感恩縣知縣項邦柱督
兵搜扒斬獲賊從二顆各官兵合攻陀邁嶺寨
張重仁部下斬獲賊從七十八顆俘獲大婦五
十口胡松部下斬獲賊從一十九顆俘獲大賊
首符門欽毋妻二口又合攻古路及朵塞胡松部
下斬獲賊首符那邦等二顆賊從一十顆俘獲
大婦三口張重仁部下斬獲賊從一十六顆俘
獲大婦一口吳樹部下斬獲賊從二十八顆又

張重仁督兵於古路朵山對敵斬獲賊從一十
三顆胡松督兵斬獲賊從一十顆吳樹督兵斬
獲賊從一十一顆張重仁復督兵斬獲賊從一
十一顆十五等日胡松督兵攻陀港寨斬獲賊
從一十一顆又各哨官兵合攻陀港寨張重仁
部下斬獲賊從七顆胡松部下斬獲賊從一十
四顆吳樹部下斬獲賊從七顆又胡松督兵追
賊至陀岩嶺搜獲自縊有名賊首符門欽身屍
呈送到職會官拘取本賊首妻毋并舊識里舍
緝事人等驗實斬取首級一顆各哨官兵合攻

花蠻山寨張重仁部下斬獲賊從五顆胡松部
下斬獲賊從七顆吳樹部下斬獲賊從三顆胡
松復督兵斬獲賊從一十六顆各哨官兵合攻
烏攬山寨張重仁部下斬獲賊從四顆胡松部
下斬獲賊從五顆吳樹部下斬獲賊從一顆感
恩縣知縣項邦柱督兵搜山斬獲賊從一顆把
截松村營千戶杜盛督兵斬獲賊從一顆至二
十五日賊勢窮極退據于佛陀山各哨官兵合
攻張重仁部下斬獲賊從三顆胡松部下斬獲
賊從三顆吳樹部下斬獲賊從共六顆張重仁

復督兵斬獲賊從三顆胡松督兵斬獲賊從二
顆吳樹督兵斬獲賊從三顆前後計筭本哨通
共擒斬首從賊人賊級一千二百七十九名顆
俘獲賊屬大婦幼男女共一百七十五名口奪
獲賊牛六頭馬二匹器械五十二件俱解送紀
功官紀驗緣照前項擒斬功級比之原議圖冊
該剿首從賊徒名數已足其先給旗榜安插過
大官田等村男子存那膽等三百九十名婦女
幼男八百二十七名口俱係真心向化似宜存
之以見不欺之信又有各村漏刃賊徒迯避各

山剿殺之餘心膽已碎魂魄半消僅存饑餓未
死之軀近該職等招下疍素養等一百八十八
名婦女幼男三百七十三名口各願復業自新
亦宜存之以見好生之仁以後續有撫到一體
安插另報除暫摘留官軍打手目兵分布防守
候稍定呈掣其餘俱掣放回等因又據廣東按
察司巡視海道閱視紀功副使黃光昇呈將會
同守巡海南道右叅議方民悅等查過前後獲
功失事人員備開職名論列功罪緣由各到臣
案查先為走報地方緊急黎情事節據廣東按

察司帶管分巡海南道僉事陳崇慶并海南衛
及瓊州府崖州各呈申稱崖州西界止強石訟
等村峒黎賊首那燕等作亂搆黨攻劫鄉村殺
擄人財燒毀房屋及判官黃本靜差趙坤文等
科害激變緣由前來俱經陸續督調漢達官軍
打手目兵人等行委廣東都司署都指揮僉事
梁希孔原任叅將武鸞各統領前去崖州會同
該道守巡官嚴督該府州縣衛所官兵相機設
法剿撫并行按察司將判官黃本靜拏究及行
該道分巡官將該衛所并督備及該州掌印巡

捕官各俸糧自失事之日為始住支俱令戴罪
殺賊候事寧備查始末功罪參呈施行又該臣
會同鎮守兩廣地方總兵官征蠻將軍太保兼
太子太保平江伯陳 具本題

知續准兵部咨為緊急重大黎情早乞添兵應援事
該巡按廣東監察御史黃 題前事該本部

查議合候

命下之日本部移咨提督兩廣都御史歐陽 會

同總兵官陳 查照御史黃 所奏事情協

謀計處審勢相機如果流毒鄉邑法不可原橫

行猖獗勢不容緩一面呈馳具

奏一面從宜動調廣州肇慶等處達官達舍及附

近衛所官軍左右兩江土兵大約不過九千員

名分作三枝選委謀勇文武官員統領前去將

前項稔惡黎賊村峒查審明確分別畫圖相機

進剿諸不係為惡村峒先期分委的當人員曉

諭安業勿使自相驚疑進兵之日仍戒勿得折

馘良善濫及無辜以希功賞違者聽巡按御史

指實參劾其或首惡已就誅擒餘黨願從招撫

即行從宜處分或即要害處所團結軍兵置戍

或令村峒黎長歲時到官省諭不必興師動衆以滋邊患可剿則剿可撫則撫務期蠻氛早蕩邊城底寧以稱委任及照起釁判官黃本靜催行按察司究問從重發落失事知州葉應時百戶王羽指揮王維通屬有罪但念用人之際合無俯從所請姑令截住俸糧戴罪殺賊仍移咨都察院轉行彼處巡按御史隨軍紀驗并查都指揮梁希孔先次領兵與賊對敵損傷的實數目通候事寧之日將剿撫過及有功有罪失事人員審擬參酌分別等第具

奏定奪等因覆題奉

聖旨是欽此欽遵又准兵部咨爲走報地方緊急黎情事該臣等會題前事奉

聖旨兵部知道欽此欽遵本部查與御史黃

奏相同咨臣查照本部先次咨文備奉

欽依內事理會同總兵官陳一體查照施行各備

咨前來臣等俱經通行欽遵會議續據廣東布政司呈該本司掌印右布政使蔡雲程會同都按二司掌印并分守等官覆議得前項叛黎恃險阻大肆猖獗崖民節被殘掠感恩繼遭圍

困焚燒殺戮慘不可言罪惡貫盈神人共憤
天討在所必加大征斯不容已等因并據瓊州府崖
州鄉官原任知縣教官并監生生員趙文獻溫
仁楊仕輔黎士奇等連名呈爲緊急賊情懇乞
大兵征剿事又該臣等會本題

知及行廣東布政司整辦軍需糧餉等項并差官齎
執

令旗令牌分投前去起調左右兩江土官目兵并
附近衛所漢達官軍民壯打手人等又行委鎮
守廣西地方副總兵沈希儀督調各土官目兵

廣西布政司帶管分守右江道右叅政魏良輔
分守左江道右叅議康朗廣西按察司帶管整
飭左江兵備兼分巡道副使徐禎分守潯梧地
方左叅將王寵分守柳慶地方右叅將劉遠各
督押前到雷州及行委廣東按察司巡視海道
副使黃光昇雇覓海船渡兵并查原委統兵廣
東都司署都指揮僉事梁希孔已該臣叅劾不
職暫委惠州衛文倖都指揮僉事張淙更替本
官回衛聽候續准兵部咨爲論劾方面不職官
員以做官守事該臣題前事本部覆議合候

命下之日本部將梁希孔先行革任負缺即便推補
仍咨提督兩廣右侍郎歐陽 行令本官戴
罪殺賊候事寧之日查覈功罪一併議擬奏
請定奪等因題奉

聖旨是欽此欽遵備咨前來轉行本官欽遵外又准
兵部咨爲剷除黎患以靖地方以圖經久事該
吏科右給事中鄭廷鵠題前事本部覆題奉
聖旨這剿捕黎賊并處置地方事宜都依擬行兵備
等官姑着戴罪管事欽此欽遵備咨前來欽遵
通行外隨該都指揮張宗陞任福建行都司軍

政僉書去訖又該臣等議將調到土官目兵漢
達官軍打手人等分爲中左右三大哨行委廣
東都司署都指揮僉事張國威俞大猷原任左
叅將今聽調武鸞廣東按察司副使錢嶸朱道
瀾僉事徐緝各督統進剿仍委鎮守廣西地方
副總兵沈希儀提調總領駐劄中哨督率兼調
度左右二哨官兵俱差官齎執

令旗令牌督押尅定嘉靖二十八年十二月二十
八日卯時一齊抵巢撲剿中間若有被虜人口
陷在賊中不能自拔及賊衆懼誅悔罪投戈願

降者大兵至日許令赤身投赴審實遞送出山
從宜安插又經給榜分發各哨轉發各處村峒
張掛曉諭及給票文發各監統官收候但有聽
撫黎人出官投首每人填給一張執照不許軍
兵濫殺臣等總統各哨親詣雷州府地方駐劄
居中調度照例約會巡按廣東監察御史陳
同到軍前糾察奸弊紀驗功次仍坐委廣東布
政司右叅議方民悅總理糧賞廣東按察司副
使黃光昇閱視紀功廣西馴象衛原任福建行
都司署都指揮僉事錢希賢中軍坐營管事及

照軍需錢糧支應浩繁又行委高州府通判曾
廷梅南海衛經歷趙案惠州府照磨劉孳增城
縣縣丞謝良在中哨惠州府通判陳紹先潮州
衛經歷羅謬肇慶府知事駱友道博羅縣縣丞
陳景和平縣主簿史朝佐在左哨廣東按察司
檢校陳嵐茂名縣縣丞馮義同南雄千戶所吏
目馮藻高州千戶所吏目唐景夷在右哨雷州
府通判吳蕙在雷州軍門各分理出納及會本
具題外續節據提調總領官副總兵沈希儀并
各哨監統副使都指揮等官錢嘯俞大猷等各

陸續呈將攻破巢寨擒斬賊人賊級及俘獲賊屬人口奪獲牛馬器械等項解報俱經巡按御史原委廣東按察司副使黃光昇審閱紀驗獲功官兵俱量行給賞陣亡傷故被傷者給與銀兩以爲營葬湯藥之資生擒首從賊徒那燕等解送前來發廣東布政司清軍右布政使劉采會同分守雷廉高肇地方左叅將馮文焯查審無寃該臣等遵照兵部奏

准嚴法令以靖地方事例押赴市曹處決其餘有詞可矜者監候勘問外又查得別卷爲明時弊

申大體以裨邊政事准兵部咨該兵科都給事中胡叔廉等題前事內一款正功賞之議本部覆議合候

命下移咨總督撫鎮官員今後遇有地方斬獲功級總兵官飛報捷音督撫總其功罪具實奏

聞巡按御史廉實舉劾等因題奉

聖旨都准議欽此欽遵備咨前來欽遵通行在卷今據前因臣爲照廣東瓊州府地方孤懸海外而崖州尤爲極南絕域與陵感萬昌等州縣境上接聯黎岐盤據恃五指諸山以爲險習強弓毒

矢以爲威叛服不常自昔而然至今則生齒日繁黨類日衆故其狡猾強悍視昔尤加如嘉靖十八九等年崖陵等處那紅等聚衆數千餘徒肆行流劫然猶尚知畏懼陽聽撫順雖鼓亂數年未敢犯及營堡逼及城邑僭及官職擅及署置如今日者也今自那燕等倡亂於崖州符門欽等響應於昌化感恩僞稱總兵叅將等官僭乘輜馬張皇儀衛各立軍師每出必擁衆數千始逼崖州城繼圍感恩縣城又繼而攻南北溝等營且至于再至于三而不悔所過殺戮支解

虜掠燒毀必盡曾不二年間三州縣之地滿目丘墟道路阻絕舉海南之境被其動搖是其罪惡貫盈誠神人之所共憤

王法之所必誅而弗可赦者也臣等每念其原經收籍事起忿激引咎開誠多方撫諭雖至於奉有明命恭行

天討之日猶多出榜文票帖廣開生路尚冀其萬一悔悟曲爲生全以廣

天地好生之仁昭

神武不殺之威及其所至皆深濠壘塹堅甲毒矢以

相格鬪然後信其自絕於覆載必不容於堯舜
之世而有必不可赦者其有誠心悔過釋戈投
順者即已給票安插茲三月之間前後擒斬首
從賊人賊級計五千三百八十三名顛俘獲賊
屬大婦男女一千零四十九名口奪獲賊牛馬
一百三十五頭匹器械二千三百八十九件枝
奪回被虜大小男婦二十五名口招撫安插除
老幼并婦女及以後續到不計外計男丁三千
七百七十六名負固者誅之投順者安之首惡
靡遺脅從咸釋寃憤之氣既除遷避之民復業

地方底定道路開通是皆仰仗

皇上

聖德同天春生秋肅並行以成歲功臣等遵承

廟謨奉揚

天威致此克捷非區區犬馬之力所能及也顧惟賞
以示勸罰以示懲實自古

國家勵世磨鈍之具而於用兵之道關係尤切臣
等所以能鼓舞群心奮勇趨事者亦惟宣

國家賞罰之典示以信必之令使之有所畏而知
勸爾除失事如原任分巡海北帶管整飭兵備

兼守巡海南道僉事陳崇慶情懦不職已該臣
叅劾奉有

欽依冠帶間任崖州知州葉應時判官黃本靜貪刻
激變俱經臣行按察司提問如律獲功如領哨
策應把截等項都指揮指揮千百戶等官殷紹
禹楊燁王溥胡松胡有名吳樹馬鎮安憲李儲
芳趙焯鄭金陳希周杜盛等俱經巡按廣東監
察御史紀驗功次照例聽覈實造冊另行奏繳
施行外臣查得監督三哨副使錢嶸朱道瀾僉
事徐緝提調總領副總兵沈希儀統督三哨原

任左叅將今聽調武鸞原任署都指揮僉事今
陞右叅將俞大猷署都指揮僉事張國威各承
監統提調之責均著督理區畫之能或先事揆
策以效萬全之圖或臨敵設奇而收一鼓之捷
奔走於波濤巖險之中多方賈勇衝冒於瘴癘
鋒鏑之際罔敢愛身內武鸞防守之日獨久却
賊之績屢彰此皆功勞顯著所當優叙者也右
叅議今陞副使方民悅職分守而消七坊之變
於未形總糧賞而制三哨之用以不乏副使黃
光昇督調兵船而翕散俱有條理閱驗功級而

稽察極其精明此皆功勞並著均當優叙者也
廣西先任右叅政今陞按察使魏良輔右叅議
康朗副使徐禎左叅將王寵原任右叅將今陞
江淮總兵官劉遠各承委督調土兵或鼓舞有
道使各官目奔命之恐後或約束有方俾各道
路奉法而無擾廣東都布按三司原任右布政
使今丁憂蔡雲程左叅政沈應龍按察使今陞
任李遂副使今陞任蔡克廉署都指揮僉事劉
滋各先後署掌印事或効謀於軍需之理辦而
用無匱乏或協議於戎務之區畫而事適機宜

此皆任事効勞官員所當均叙者也中軍坐營
原任都指揮僉事錢希賢梧州坐營都指揮僉
事蔡禎職司戎馬分布有條廣州府署印通判
曾廣翰雷州府署印同知張準瓊州府署印同
知陳瑤崖州署印瓊州府通判鄒伯貞梧州府
知府翁世經各以職事協辦軍需處置周詳供
應不匱內鄒伯貞承廢墜之政而脩舉獨苦撫
殘傷之衆而安集尤多萬州今考察調任知州
鄺民舉儋州知州陳澶定安縣知縣徐希朱瓊
州府經歷何組廣東按察司檢校陳嵐高州府

通判曾廷梅惠州府通判陳紹先雷州府今考
察去任通判吳憲南海衛經歷趙宋潮州衛經
歷羅諤肇慶府知事駱友道惠州府照磨劉孳
增城縣縣丞謝良博羅縣縣丞陳景茂名縣縣
丞馮義同和平縣今考察去任主簿史朝佐南
雄守禦千戶所今考察去任吏目馮藻高州守
禦千戶所吏目唐景夷或委把截地方或委分
理糧賞皆能不辭艱險頗效勤勞以上各官亦
當量叙者也又如總督備倭以都指揮體統行
事神電衛指揮使黑孟陽雷州衛指揮僉事顧

賢各先發防守地方既數坐觀而致敗繼委統
領小哨又不應機以圖成神電衛指揮僉事張
重仁身膺領哨懷利心以妄圖事每違機致賊
首而久遁防守崖州廣州後衛指揮僉事任漢
守把牙力營海南衛左所百戶黃國忠哨守昌
化縣馬嶺營儋州所百戶陸中玉各承地方之
委殊無截捕之功感恩縣知縣項邦柱專膺城
守之寄難逃失事之愆但各官繼能自奮俱獲
有功內項邦柱兩入賊巢身親撫諭事雖中變
志誠足嘉此皆功過相等俱應准贖者也督備

儋昌崖地方海南衛戴罪殺賊指揮僉事王維
平時既守備不設臨事復畏縮不前良民之被
虜被殺者無筭曾不動心村落之或破或逃者
相望尚徒束手及其抱迫切而告救猶忍發忿
怒而肆威原發協守牙力營海南衛指揮使周
祚防守崖州雷州衛指揮僉事趙廷舉原委領
軍協捕海南衛指揮僉事周昇接掌崖州千戶
所印本衛左所千戶盛祚守把崖州合水營崖
州所千戶洪曉海南衛左所千戶谷中寶守把
牙力營崖州所百戶劉謨儋州所百戶薛元明

原發領軍防守崖州廣州左衛中所千戶王繼
節值黎賊出劫既不能奮勇以截捕數遇官軍
戰敗又不能相機以救援俱屬有罪內周昇已
故王維周祚等雖隨軍各獲有功但罪重功微
難以准贖者也原委防捕廣東都司署都指揮
僉事今革任梁希孔領兵初至長撫者即五十
餘村寵妾繼收用事者惟一二奸黨軍中而肆
淫樂事犯不祥屬官日共戲酣機用多泄軍威
因而盡廢師徒之喪敗實多賊勢由之日張士
民之冤號莫訴崖州千戶所原掌印千戶王鳳

鳴續委署印兼巡捕戴罪殺賊百戶王羽貪饕餮
是肆險詐尤深賣放軍人餘丁弛備已久科索
黎夷財物歛怨已叢誘將官娶妾以結爲腹心
假杯酒戲樂而探泄機事海南衛原掌印今陞
德慶守備指揮僉事李重敷原暫署崖州所印
本衛後所千戶吳愷先後防守合水營海南衛
前所千戶俞宗左所百戶王承恩先後哨守感
恩縣縣門堡昌化所百戶陶繼先儋州所百戶
何浩昌化千戶所掌印崖州所千戶陳畢昌化
所巡捕海南衛右所百戶郁漢俱膺軍兵之管

轄坐視盜賊之縱橫瓊州府知府金椿原委領
兵協捕照磨杜格崖州先巡捕後兼署印吏目
王徽感恩縣巡捕典史洪孔仁昌化縣知縣黃
彬巡捕典史趙天彝地方之責任有歸職守之
荒惰已甚內梁希孔王羽各原奉

欽依行令戴罪殺賊梁希孔自革任回衛竟不在哨
立功王羽爲別事提去亦未有功可贖與王鳳
鳴等皆有罪無功但金椿洪孔仁黃彬趙天彝
各已考察去任似應免究其梁希孔等俱應提
問者也及照副使朱道瀾僉事徐緝見奉考察

去任但各官監督之功似不可泯隨查得嘉靖二十五年內該前提督兩廣軍務兵部右侍郎兼都御史張督調官兵征進廣西柳州里隆地方該府知府江滿從征有功被劾閑任事竣班師題奉

欽依江滿陞一級致仕今朱道瀾等比與事體相同如蒙

皇上軫念邊方用武之地

勅下該部再加查議將前項有功効勞官員酌擬

上請量加陞賞朱道瀾徐緝比照江滿事例各量陞

職級准其致仕功過相等官員俱與准贖與有罪考察去任官員俱免究其見任有罪無功與罪重功微各官俱行巡按監察御史提問庶有功者知所勸有罪者知所懲而將來地方用事亦不患其乏才矣再照前項賊徒俱已平定然久安之策所宜預圖除將調征兩廣漢達官軍土官目兵人等量行犒賞掣放休息及行叅將俞大猷兵備副使方民悅酌量摘留目兵打手漢達官軍鄉兵黎兵人等分撥緊關要害去處立營防守藉此兵威之餘將各山迯匿殘徒盡

行招撫安插復業候數月之後事體稍定人心
稍安漸次掣放并查各被害地方量行賑濟校
撫殘黎量行優卹仍將給事中鄭廷鵠奏行興
學校禁弓矢設縣所鑿通衢興水利徙反側等
項善後事宜各從長查議施行外緣係剿平黎
賊查覈功罪以明賞罰事理未敢擅便爲此具

本請

旨

嘉靖二十九年五月二十九日

交黎剿平事畧卷之四



